

男則得壽 女則得福 上侍天曹 中係星辰
 三元掌籍 五帝司迎 東斗主算 西斗記名
 此斗落死 南斗上生 元辰保命 中斗延齡
 道德生育 天地覆載 三元照曜 晝夜相代
 四時五行 物無不賴 五穀資生 絲綿被體
 和之以樂 檢之以禮 天子穆穆 人倫濟濟
 天地大道 功深無裏 上孝父母 下友兄弟
 用天之道 亦無災沴 勤奉天地 長生同遊
 反此而行 致速恐泥 貧窮下賤 疾病連帶
 贖罪罪定 司殺未制 沉淪地獄 未謝人世
 萬劫受殃 莫之可計 善男善女 邪心未誓
 老君曰言此經專責乃衆生謝過祈恩修其
 之要可以本命元辰四時八節六齋十直之
 日或饗水旱或祈五穀或祈福祐或謝過消
 災或解呪詛隨其所願虔心至禱請正一三
 洞法師或一或二或三或五或七人隨力建
 功轉誦此經修齋行道福德立降消諸不祥
 或於三春天地發生之時或於秋冬萬物成
 熟之際燒香修奉開轉此經以荷大道天地
 生育之功天能聽早道能通感錄茲至禱咸

賜福祥玄理深微感恩莫測敬之哉敬之哉
 凡修天公齋直須齋潔預禁葷辛掃洒宅院
 是事精潔大道天地鑒錄誠懇切忌使常用
 之物及孝子孕婦雞犬僧尼不潔之物犯傷
 天真大道天地賞罰無私恭慢之慮威不可
 當凡齋科供養之具直須事事豐足若稍輕
 慢上帝不敬反成殃累一切男女敬而慎之
 此天公勅邪神呪若有信心奉道善信男女
 凡欲持課先須燒香頂禮冥心
 三清上真諸天天帝天父地母日直香官土
 地靈祇然後叩齒三通誦之七遍自然靈應
 感徹天真護持百邪不干萬罪消滅也
 太上說經既已尹喜真人及侍衛仙衆一時
 頂禮恭敬再拜勸而奉行
 太上洞神天公消魔護國經卷下

太上說紫微神兵護國消魔經
 爾時

太上老君以上皇二年建辰之月八日於紫
 微上宮爲大梵天帝四極高真九天元生三
 天真皇說紫微神呪靈寶大有自然神兵護
 國消魔品時開皇甲申數極百六天地不閉
 災氣流行五穀不豐人相誅害兵災四起國
 人不安其有積善積德之人修真之士超度
 洪厄位列仙官凡夫不學不顧宿命不遵經
 法是非紛亂四見昏迷六情所染心不自尊
 造惡之時無所畏懼此蓋衆生業感故使其
 然是時鄴都六洞諸天魔鬼晝伏夜出變現
 醜惡之形其鬼魔各將眷屬行五種瘟病患
 者昏死鬼氣衝人變爲疾疹是時牧宰群品
 文武兆庶鎮山壓野馳迸驚怖男號女哭悲
 苦切楚時感動上天
 天尊觀見慈念蒼生受諸苦惱乃勅虛危二
 宿託精應變以真爲父以元爲母以始爲姓
 三氣降於廣靈之宮化爲大塊形如混沌上
 出九光精安耀日霞彩煥爛影射太微常有

王女金童巨虬獅子四直符吏守護聖胎至建申之月上七之辰其胎自圻若大雷震脫落紫胞洞應玉形簪身五百丈自云真武之神披髮皂袍仗劍穿靴神兵符吏雷公電母四直使者捧從其身是時

天尊令真武於鄴都山降伏鬼魔真武奉

天尊勅遂令北鄴殺鬼天獸副將部領神霄大兵九炁功曹三天玉女七炁神君五靈真宰黃甲大神天兵符吏百千萬眾與六洞鬼魔大戰於洞陰之野是時鬼主又以坎離之氣化蒼龜巨虬欲施變現真武以神力摧伏攝於足下真武復遣金鈴擲火大神念伏魔之章嗟氣出口化大火輪乃燒鬼眾毛髮焦爛妖力無施回心悔過乃發大願歸命至其是時真武遣天兵符吏乃鎖鬼眾送於鄴都

大洞

天尊言陰極告變陽數之來或則黃星聚彩赤符表瑞紫氣衝庭五星聚井流虹貫月大電達樞然後稟嶽降靈誕星孕輔而成曆數乃有天下也聖君出世賢臣輔弼奸邪伏匿

五兵銷偃九穀豐登為孝日生人民樂業真君有功於世為民除害德動上穹

天尊遣金華玉童繡衣使者齋九龍符命下詔曰汝有穢毒伐惡之功可封為北極總統玄天大將是時大聖馭蒼龍朝謝

三清爾時下界真仙及諸聖眾翹仰雲路顧盼神光目送霞飈拜辭真帝須臾之頃天垂紫雲地起輕霧雲霧交合唯聞天樂漸漸高遠會中大眾各還本土一依金口宣揚道化流布寶經四天之下皆蒙真祐福德無盡永當奉行

太上說紫微神兵護國消魔經

二經同卷

太上日月混元經

太上洞神五星諸宿日月混常經

女四

太上日月混元經

乾坤坎離剛柔配合四者相包謂之素倫二四三五一天地之精二八之數相應天符會于鼎中鼎為天地為神室乾坤為明堂藥物為日月為夫妻故為君臣陰陽即候其火隨爻之動漸契於四時合於陰陽五行相剋更為父母春秋既分刑德並會是以黃鍾建子陽左至巳蕤賓建午陰右至亥從一至九數終即復更始也災火既張嬰兒聲悲昇降奔突屢欲翔飛兢兢惕惕戒慎不虧謹於動靜若夫君驕臣佞賞罰不中璇璣失度寒暑不時災害自生若君聖臣正天地清寧日月炳煥道炁隆昌王化太平寒暑順律斗樞應節五行八卦庶事修明鍊兩既克已諧剛柔調節朕失無失時矣玄輝五色變化無常霏霏